



Komunikado 2020-031

CBCS lo pasa pa e siguiente generashon di pago

Willemstad/Philipsburg: Mundo di teknologia ta avansá rápidamente i ta afektá nos bida kada ratu mas. Esaki tambe ta inklui e forma kon nos ta ehersé nos pagonan diariamente, manera pago di komestibel, gasolin, utilidat èts. Pago elektróniko ta un parti esensial di nos bida i nos sistema nashonal di pago ta e fundeshi di un ekonomia monetario saludabel.

Centrale Bank van Curaçao en Sint Maarten (CBCS) ta e propietario di i ta operá e National Automated Clearing and Settlement System (NACS2) ku ta regulá e tráfiiko di pago entre bankonan lokal na Kòrsou, Boneiru i Sint Maarten.

Aktualmente, nos sistema di pago NACS2 ta den proseso di renobashon pa e vershon mas resien NACS3 pa kumpli ku e siguiente generashon di teknologia di pago, partikularmente e stándar di pago ISO 20022. Alabes, e sistema nobo ta konsistí di algun mehorashon importante ku ta fortalese e funshonamentu di e sistema.

E stándar di pago ISO 20022 ta e stándar nobo di mensaheria di pago nashonal i internashonal. E ta generá un idioma i modelo komun pa data di pagonan rònt mundu. E ta proveé un kalidat di data haltu kompará ku otro stándarnan ku ta nifiká un kalidat di sistema di pago mas haltu.

Relashoná ku e introdukshon di e sistema nobo, den luna di òktober CBCS a ofresé un training pa usuarionan di NACS3 pa bankonan komersial di Kòrsou, Boneiru, i Sint Maarten na un forma virtual. Durante di e training, partisipantenan a keda introdusí na e sistema nobo di NACS3 i a keda informá di e kambionan prinsipal kompará ku e sistema aktual. E partisipantenan a haña oportunidat pa simulá transakshonnan pa praktiká.

E renobashon di e sistema ta prinsipalmente teknológiko i lo mehorá e infrastruktura di pago segun stándarnan internashonal di pago. Esaki lo no tin implikashon direkto pa públiko en general.

NACS3 ta planeá pa keda implementá riba dia 9 di novèmber 2020

Willemstad, 26 di òktober 2020

CENTRALE BANK VAN CURAÇAO EN SINT MAARTEN